

PKR dakwa menteri cuba tutup kesalahan polis

MalaysiaKini.com

May 13, 2012

PKR mendakwa Menteri Dalam Negeri Datuk Seri Hishammuddin Hussein cuba menutup kesalahan polis apabila mendakwa terdapat pihak yang cuba menyebabkan kematian ketika perhimpunan 28 April.

Dua orang naib presiden parti itu, N Surendran dan Nurul Izzah Anwar, mendakwa Hishammuddin bertindak demikian melalui kenyataan yang mengecam Majlis Peguam sebagai pertubuhan yang bersikap prejudis.

"Kenyataan Hishammuddin semalam juga satu bukti tindakan sistematik oleh Kementerian Dalam Negeri, polis dan pemimpin BN untuk memburuk-burukkan peserta perhimpunan BERSIH 3.0 serta menutup perbuatan tidak mengikut undang-undang oleh polis," kenyataan itu dipetik.

Surendran dan Nurul Izzah berkata, kenyataan "gaya Goebbels" Hishammuddin itu juga melanggar sumpah yang dibuat menteri berkenaan ketika menerima pelantikan tersebut.

Tambahnya, tindakan itu sebahagiannya mungkin disebabkan hubungan langsung Hishammuddin dengan keganasan polis ke atas orang awam dan wartawan dalam perhimpunan tersebut.

Dengan itu, Surendran dan Nurul Izzah berpendapat bahawa satu siasatan bebas mesti dijalankan segera ke atas tindakan Hishammuddin ketika, dan sebelum perhimpunan tersebut.

"Sebelum siasatan tersebut, kami menggesa supaya Hishammuddin digantung daripada jawatan menteri mengikut Perkara 43 Perlembagaan Persekutuan," katanya.